


Müdamaints illa direcziun da scoula ed internat

Cussagl administrativ da l'IOF ha elet a duos personas

■ (anr/fa) D'utun ha demischinà il rector da l'Institut Otalpin a Ftan Bruno Büchi. Uossa ha elet il cussagl administrativ da l'IOF a Sven A. Kohler sco successur fin la fin da l'on da scoula 2014/15. Cur cha'l rector Bruno Büchi ha demischinà al principi da november amo d'urant seis temp da prouva ha il cussagl administrativ da l'Institut Otalpin a Ftan (IOF) stuvü tscherchar üna soluziun. «No vain propcha dad ün mumaint a l'oter stuvü chattar üna manadra o manader da la scoula chi garantischa l'andamaint almain da quist on da scoula. Quai d'eira il principial», disch Johannes Flury, il president designà dal cussagl administrativ da la scoula media in Engiadina Bassa. Quai es uossa gratià: «D'incuort ha il cussagl elet a Sven A. Kohler sco manader da l'IOF fin la fin da quist on da scoula.»



Johannes Flury es il president designat dal cussagl administrativ da l'IOF. FOTO V. BÜRKL

«Fich furtünats da til avair chattà» Kohler es creschü sü a Malans ed ha fat la matura a la scoula media a Schiers. Tanter oter es el i a scoula eir pro Johannes Flury, il qual d'eira da quel temp recur da la scoula media i'l Partenz. Davo la matura ha'l stübgia a l'università a San Galla, fat il licenciatur in economia d'interpraisa e fat il diplom da magister da commerzi. Fin d'utun 2014 d'eira'l commember da la direcziun da las HSO Handelsschulen. Quai es üna chadaina da scoulas da commerzi in ses löes in Svizra cun bundant 3000 studentas e

students. «Kohler d'eira rector d'üna part da quellas scoulas ed apunta eir commember da la direcziun», manzuna Flury, «quist on ha'l demischinà e d'eira i'l mumaint, quai chi'd es statta nosa furtüna, sainza piazza da lavur.» El es stat pront da surtort la piazza da rector da l'IOF fin la fin da l'on da scoula 2014/15. Cha'l cussagl administrativ saja fich furtünat da sia reposta positiva, s'allegra il president designat: «Sven A.

Kohler ha experienza cun manar scoulas medias e cunquai ch'el es creschü sü in Grischun cugnuoscha el eir il sistem chantunal da nossas scoulas medias. Quai es fich important.»

L'IOF darcheu cun equipa stabla

Daspö quista stà maina Christophe Zuber l'internat da l'IOF. «El ha üna grond'experienza cun manar ün internat, però in tuot ün oter context e contuorn», disch Johannes Flury. Avant vaiva Zuber lavurà in üna scoula sper Berna cun giuvenils chi vaivan fadia d'imprender. Chi s'haja vis ch'el nu d'eira la persuna ideala per manar ün internat cun gimnasiasts, cuntinuescha Flury, «i s'ha eir vis cha'l müdamaint d'eira istess massa grond, perquai vaina decis cumünavelmaing, el ed eu, da tscherchar ün'otra soluziun.» Quella s'haja chattà cun contactar a Joe Zangerl chi lavura parzialmaing pro Swiss Ski. Zangerl es stat avant vainch ons il prim manader da la classa da sport da l'IOF. «No vain vis chi'd es sainz'oter pussibel cha Zangerl maina insembel cun l'equipa sü Ftan l'internat da l'IOF, el starà be s'absantar per l'ün o l'oter di causa sia lavur parziala per Swiss Ski.» Johannes Flury es satisfat cullas elecziuns dal cussagl administrativ: «I's po dir cha no hajan uossa darcheu ün'equipa stabla, uossa guarda darcheu cun ün pa daplü fiduzcha vers l'avegnir co avant ün pèr eivnas.»

Zernez fusiunà fa quint cun ün guadogn

(anr/afi) Ils 105 votants da Lavin, Susch e Zernez han approvà il prim preventiv dal cumün fusiunà. Quel prevezza ün guadogn da bundant 3,5 milliuns francs. La fusiun dals cumüns da Zernez, Susch e Lavin va in figur a Büman 2015. In lündeschdi saira es gnü preschentà il preventiv per l'on 2015. Quel prevezza entradas da bundant 19,5 milliuns francs e sortidas da var 16 milliuns francs. Cun quai prevezza il cumün da Zernez pel prim on da gestiun ün suravanz da bundant 3,5 milliuns francs.

sectur da l'EED. Plünavant han las votantas ed ils votants approvà ün credit da 100 000 francs pella planisaziun e la fabrica da duos vascas pel provedimaint d'aua ed ün credit d'investiziun da 123 000 francs pel mantegnimaint da duos vias.

Fracziun Zernez resta pro DMO ESTM

Illas trattativas da fusiun da cumüns es il tema turissem stat central. I's vaiva s'abinà avant la fusiun cha'l suveran da Zernez possa decider amo sulet davart il proseguimaint da la collavuraziun culla destinaziun turistica DMO Engiadina San Murezzan. In occasiun da l'ultima radunanza cumünala dal cumün da Zernez es gnü prolungà il contrat culla destinaziun turistica DMO Engiadina San Murezzan. Il suveran ha cun 52 cunter 40 vuschs approvà la prolungaziun dal contrat da collavuraziun per ulteriurs trais ons e quai fin dal 2018.

Credits per in tuot 373 000 francs

Las 105 personas preschaintas han approvà differents credits per totalmaing 373 000 francs. Per pudair infuormar als indigens sco eir als giasts prevezza il cumün da Zernez d'installar in mincha fracziun almain üna tabla d'infuormaziun electronica. Ils cuosts s'amuntan a 150 000 francs per quatter tablas digitalas e pellas investiziuns necessarias sül



Ils responsabels da la Chasa Fliana a Lavin vaivan invidà ad ün di da las portas avertas. MAD

Tredeschin leder fin

Preschantaziun dad ün cudesch illustro i'l Chesin Manella

■ (ab) Tredeschin leder fin, cura tuornast? Marculdi passo d'eira'l passo a Schlarigna. Illa libraria rumantscha haun preschanto duos artistas ün'ediziun da la parevra Tredeschin raquintada da Gian

Bundi adattada in vallader da Bettina Vital. La chesa editura rumantscha ho edieu cul sustegn finanziel da diversas varts quista parevra illustreda da l'artista Pia Valär. L'actura ed animatura Annina

Sedlacek ho savieu clapper ils iffaunts cun sieu möd fras-ch e dramatic da quinter las aventüras da Tredeschin. Cun maestia e'la steda buna dad integrer punctuelmaing eir il giuven public. Taunt las mammas, nonas, amih e magisters preschaints haun giodieu ün inscunter divertent. L'illustratura ho in seguit descrit cu ch'ella ho piglio per mauns l'incumbenza da crear ils putrets in cultur. Pia Valär as ho lascheda guider dad inspiraziuns spontanias e dal plaschair da fabuler s'vess, integrand in möd subtil allusiuns e novs elemaints divertents i'ls putrets. Cumbain cha quista lavur es steda sia prim'experienza cun illustrer üna parevra as po constatar cha l'artista ho già sviluppo sieu stil persunel ed incunfundibel. Quist nu sarò l'ultima vouta cha sias illustraziuns ans sorprendan, ans faun rir, faun critica cun figuras e situaziuns grotescas u sensiblas; dimena pudains ans allegger. Quist bel regal a la Rumantschia vain güst a temp per tuot quels chi tscherchan auncha ün bel regal da Nadel.

Il cudesch po gnir retrat illa libraria da l'Uniuon dals Grischs, Chesin Manella, a Schlarigna e tar la Lia Rumantscha a Zernez u a Cuira.



Annina Sedlacek e Pia Valär haun preschanto il Tredeschin. MAD

Di da festa a Lavin

■ (ugb) Il di da festa a Lavin dals 9 december 2014 es stat ün grond success. L'avantmezdi, üna sala da la chasa da scoula bain occupada cun duonnas ed homens, pronts pel chant avert. Cun plaschair ha l'auditori chantà las bellas chanzuns d'advent e da Nadal cha Christa Pinggera avaiva preparà. A l'invit da las portas avertas in Chasa Fliana as es següi gügent. Pro l'aperitiv ha il president Dumeng Duschetta quintà, in preschentscha dals anteriurs presidents Rico Parli ed Ulrica Guidon e da divers commembers da la suprastanza, da las renovaziuns chi sun gnüdas fattas adonta da las cuntshaintas difficultats finanzialas. Cun grond dalet ha'l lura invidà da far il gir tras la chasa. La schoppa da giuotta ha gustà bain a tuot la cumpagnia. Quella es gnüda fatta d'urant tuot ils cuors da nosa cuschinunza in chasa s'vess. Per l'üna e mezza es stat previs ün concertin da citra e preschantaziun da quel instrumaint dals conju-

gals Eggimann da Zuoz. Forsa cha ün o l'otra ha surgnü cuvaidda dad imprender a sunar quist instrumaint in ün dals prossemes cuors? Sco adüna daspö blers ons es alura gnüda landervia la gruppa da teater. Uossa d'eira la sala in chasa da scoula plainischma e tuot chi ha gnü grond plaschair dals divers sketschs chi sun gnüts preschantats. Las ses duonnas dal cuors da teater han giovà cun grond plaschair ed han divertit il public. Pro caffè e tuortas as haja gnü l'ocasiun da baderlar cun amis e cuntshaints, lapro ha sunà la musica Chapella Engiadina. Id es impussibel dad ingrazchar a tuot chi chi ha contribuì a la buna reuschida dals dis dals cuors e da quista bella finischun. Margaritta Filli ed Anna Bonifazi sun las bunas ormas chi sun adüna prontas da güdar cun cussagl e fat. Las duonnas da la suprastanza fan blera lavur davo las culissas ed han tgnü dret sü la bindera eir in temps fich burasus. A tuortas ed a tuots ün grond «Dieus paghi!»

reclama

Normale Öffnungszeiten:
Mo - Do, 8.30 - 19.00 Uhr
Fr, 8.30 - 21.00 Uhr
Sa, 8.00 - 17.00 Uhr

pizol-shopping

pizolpark ■ Pfister pizolcenter BAUHAUS

21.12.14: Sonntagsverkauf, 11*/12-17 Uhr

* Restaurants

75 shops

1800 P

mels/sargans

www.pizol-shopping.ch